



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 2

Yangia anidakangma :

Tir Yimyim

tiryimyim@aolima

tir yimyim

TAPAK 7

Petrol jenjang sen 200 ajungba sülen  
two-wheelers timba akumtsü: Kalita

Uttarakhand: Anentsüh aser  
tzümetsüng lendong nung nisung 16 asü

VOL. XIX NO. 12 (ADOK 12)

DIMAPUR

RASEMNÜ (WEDNESDAY)

MONGPUTENI (OCTOBER) 20, 2021

₹ 5.00

## NSCN (R) telemtetba sota atar

**Dimapur, October 19, 2021 (TYO):** October 19, 2021 nü Hoito yim nung NSCN (R) senden ka amendang Regional Authorities, UT-1, Secretariat Staffs, Naga Army, Political Wing aser ACLs teimba ka aden.

"Ajisüaka, WC NNPGs convenor, Inno N. Kitovi Zhimomi-i mepishiba agi anogo ishika atema pusema nungitba sangdong magütsüi atatsü" ta

MIP (Ministry of Information & Publicity), NSCN/GPRN (Reformation)-i ashi.

Tanü senden nung adenba HoD, HoM, UT-1 Chairman / Chief Secretary-i anir Regional Authorities Secretariat Staff aser Home Secretary, Naga Army Official ajaki Collective leader, Inno Akato Chophi pusema nungitba sayuogo, ta MIP sangdong nungsa shia lir.

## Dimapur nung NSCN-K züngsem ka khaset

**Dimapur, October 19, 2021 (Agencies):** Dimapur district kübok NSCN (U) designated camp Khehoi anasa Deobar aonung 11:00 ako meta nisung ka khaset.

NSCN-(U) aser Niki Sumi-i aniba NSCN-K tsüingda khatpang NSCN-K additional secretary Atoka Kinimi khaset.

NSCN (U)-i NSCN (K) kar Khehoi nung puoka ayuba anizüktsü atema NSCN (K) züngsem pezü iba tesemi ao. Idangji NSCN (U)

züngsemtemi parnok mena aliba gari anendaktsü aser iba jagi parnok khatp ta osang angazüker.

Iba mapang NSCN (K) züngsem ka khaset aser ka NSCN (U)-i apu. Par pezü rongnung nisung ka police-i apu aser ka jena ao.

NSCN (U) aser NSCN (K) teloktemi India sorkar den ceasefire tenangzüktep agia lir aser parnoki Ceasefire Ground Rules alema inyaksangshiogo ta osang ajanga ashi.

## Centre-i Covid vaccine dose tanabuba agütsütsü ayongzükter

**New Delhi, October 19, 2021 (Agencies):** India nung Covid vaccine indang dose agüja aruba nung joko nisung billion ka tajunger anungji state aser Union Territory temi dose tanabuba agütsütsü atema mapa tuluba inyaktü ayongzükter ta Centre-i metetdaktü.

Linük ajungalen COVID-19 vaccine agütsütsü tenzükba sülen crore 99 tashi agütsüogo. Iba mapa ya January 16, 2021 nü Prime Minister Narendra Modi-i tenzükja liasü.

Union Health Secretary Rajesh Bhushan-i Hombarnü state aser UT sorkartem nungi Health Secretary aser national health mission nung mission director tem den video conference ajanga senden amendang vaccine agütsüba osang metetpelaa liasü.

"India nung vaccine indang dose billion ka jüingnüa agütsüogo aser iba atema state aser UT ajak

nem tenüngsang agütsür" ta Bhushan-i ashi.

"Nisung aikati Covid vaccine indang tanabuba dose ano magi lir anungji state aser UT sorkartem dose tanabuba agütsütsü atema mapa tuluba inyaktü ayongzükter" ta paisa metetdaktü.

"State aika nung vaccine indang dose tanabuba agütsütsü peria dang lir. India sorkari state aser UT tem nem vaccine dose talila agütsütsü renema lir" ta paisa ashi.

Health Ministry-i tesüiba küm ka tashi 'international travel' asoshi SOPs agüja arur aser parnoki Ministry of Home Affairs, Bureau of Immigration, Ministry of Civil Aviation aser Ministry of External Affairs den iba onük atema jembidar.

Iba atema Health Ministry-isa state aser UT sorkar tem dang nungi tebilemba meshiogo.

## Indian Army-i Cambrian Patrol Exercise nung hon sempet angu

**Guwahati, October 19, 2021 (Agencies):** United Kingdom (UK) nung Cambrian Patrol Exercise alidang Indian Army-i Hon sempet nguogo.

Alima kübok linük balala nungi special forces aser regiments dena telok 96 den Indian Army-i toktepdang iba takok angu.

October 13-15 tashi UK kübok Brecon nung iba sentong agidang Indian Army tenüng nung 4/5 Gorkha Rifles

(Frontier Force)-i shilem agia liasü.

Cambrian Patrol Exercise ya "Olympics of military patrolling" ta ajar.

Indian Army telok nem Royal British Army nung Chief of general staff General Mark Carleton Smith-i sempet agütsü.

India House nung Indian high commissioner to Great Britain - Gaitri Issar Kumar-ia Indian Army telok nem tenüngsang agüja liasü.

## COVID-19 Nagaland: Nisung 14 dak putet, 17 taneptsü angu & 1 asü

**Kohima, October 19, 2021 (TYO):** Nagaland nung Mongulbarnü nisung 14 dak COVID-19 putet aser ka asü.

"Tesüiba ghonda 24 tsüingda nisung 14 dak COVID-19 putet. Parnokji Dimapur nung 10, Mokokchung nung 3 aser Kohima nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nisung 17 taneptsü angu. Parnokji Dimapur nung 7, Kohima o Phek nung pezüzü (4) aser Mokokchung nung 2 lir" ta

paisa ashi. Nisung 31,641 rongnungi 29,693 taneptsü nguogo aser ibaji 93.84% taneptsü anguba lir, ta Dr Kikon-isa ashi.

Tang nisung 247 anepaludar saka parnok 178 dakbo shirangba yimya kecha mali, ta paisa ashi.

Mongulbarnü Dimapur nung COVID-19 puteta alir ka asüba züngsema tasür 676 kümogo, ta paisa shisem.

"Hombatashi nung nisung 702,603 nem COVID-19 vaccine indang dose 11,48,877 agütsüogo" ta State

Immunization Officer, Dr Ritu Thurr-ia ashi.

Vaccine agirtemji frontline workers 60,957, healthcare workers 15,998, arishi küm 45 ser temapur 200,861 aser arishi küm 18 nungi 44 tsüingda alir 424,787 lir, ta paisa shisem.

"Vaccine agirtem rongnungi nisung 446,274-i dose anaprong agiogo. Parnokji frontline workers 47,768, healthcare workers 13,344, arishi küm 45 ser temapur 152,590 aser arishi küm 18 nungi 44 tsüingda alir 232,572 lir" ta Dr Thurr-isa metetdaktü.

## Mizoram nung political party temi MCC alema inyaker: MPF

**Aizawl, October 19, 2021 (Agencies):** Mizoram nung arogoi nungitba Mizoram People's Forum (MPF)-i by-election atema political party temi model code of conduct (MCC) alema inyaksangshir ta tai tongloktü.

October 30 nü Kolasib district kübok Tuirial assembly menden atema by-election agitsü lir.

Mizoram People's Forum (MPF) ya state nung free & fair elections maparen ketdangsüa reprangtsü atema tentetba telok ka lir aser parnoki Kolasib district election officer aser deputy commissioner dangi shidi ka zülu.

Tuirial assembly constituency indang by-election atema political party temi MCC alema mapa inyaker anungji parnok merenshitsu ta MPF-i ashi.

Parnokisa political party kari ochimashi inyakba indang video clips aser kulikakettem kar kuli agütsüogo.

"Model Code of Conduct alema inyakba political party temi merenshitsu atema ni mepishir" ta MPF general secretary Rev. R. Lalnuntluanga-i shidi nung shia lir.

Election Commission of India

(ECI)-i latetsüba inyakyim aser political party tem o MPF tsüingda memorandum of understanding (MoU) nung sign süa aliba onüktem alema inyaksangshir, ta MPF lennir kati ashi.

Political party kari voter tem mesütsü atema sen aser rations alemer aser social services ajanga süpokrem agütsür, ta pai metetdaktü.

Telok kari lokti chiyungtsü sentong ayonga amonger saka iba ya MPF aser party tem tsüingda MoU nung lateta aliba alema lir, ta paisa ashi.

MPF ya 2006 küm Mizoram Presbyterian Church dena arogo tongtitemi tentetba lir. Election temi aser talenba kecha melii agitsü asoshi maparen ketdangsütsü alizüing nung MPF tentet.

MPF-isa Young Mizo Association (YMA), Mizo Hmeichhe Insuihkhawm Pawl (MHIP) mesüra Mizo Women's federation aser Mizoram Upa Pawl (MUP) mesüra Mizoram Elders' Association den yariteper.

MPF-i Mizoram nung elections maparen nung tenük yoker aser ECI indang model code of conduct den liromedema

tetuyubatem agütsüsemer.

MPF-i candidate shimba, party temi sen endokba aser election manifesto tem nung enokba onüktem repranger.

Parnokisa "common platform" ta ser sentongtem ayonger aser iba nung candidate temi o jemi aser tesentepertemia asüingdangbatem langzüdaktsür.

Taoba mapang MPF-i Mizoram nung election talenba kecha melii aser temi agitsüsa mapa inyakogo. Ajisüaka, MCC mesüra MoU alema inyakba atema political party temi merenshitsu atema parnok dak tashi mali.

ZPM MLA Andrew H. Thangliana ajungbena asüba sülen Tuirial by-election agitsüsa aküm aser iba asoshi Mizo National Front (MNF), Zoram People's Movement (ZPM), Congress aser BJP nungi candidate 4 lir.

October 30, 2021 nü polling asüba sülen November 2 nü votes azüingtsü.

Tuirial assembly constituency nung vote enoktsür ajak agi nisung 17,911 lir aser parnok rongnung tetsür 9,092 dena lir ta election ketdangsürtemi ashi.

## IMD-i state aika nung tzüinglu arutsü metetdaktü

**New Delhi, October 19, 2021 (Agencies):** India kübok state aika nung tzüinglu kanga arur. Tesüiba anogo ana tsüingda tzüinglu dak sendakba lendongtsüdong balala atalokdang Kerala nung nisung 30 aser Uttarakhand nung 23 taküm samaogo.

Indian Meteorological Department (IMD)-i taruba anogotem nunga tzüinglu arutsü ta metetdaktü. IMD-i asüing (Bodbar) nungi tenzükter tesem aika nung tzüinglu arutsü shiogo.

IMD-i asüing nungi Kerala kübok district 11 nung 'Orange Alert' agütsüogo aser tzüinglu kanga arutsü ta metetdaktü.

IMD-isa Brihostibarnü Kerala kübok district 14 asoshi 'Orange alert' sangdongogo.

'Red alert' ya ghonda 24 nung tzüinglu 20 cm aruba lir. Külen, 'Orange alert' ya 6 cm nungi 20 cm tzüinglu aruba lir. Maneni, 'Yellow alert' ya 6 nungi 11 cm tzüinglu aruba lir.

IMD-isa J&K aser Ladakh nung October 23 nü tzüinglu arutsü aser rüjeb alatsü osang

metetdaktü.

Uttarakhand nung anogo asemnü tzüinglu aruba anentsü saka iba sülen October 22 nungi Western Himalayan Region nung tsüingsang mejungi akümstü ta IMD-i ashi.

Asüing (October 20) nü Bengal, Odisha, Jharkhand aser Bihar nunga tesem kar nung tzüinglu arutsü ta IMD-isa ashi.

October 20 nü Northeast kübok Assam aser Meghalaya nung tzüinglu kanga arutsü, ta IMD-isa metetdaktü.

## Osangbener tejen, Krome-i züluba kaket sayaogo



MLA Khriehu Liezietsu den kaket zülur Kopelo Krome aser publisher Rita Krocha nungertem October 18, 2021 nü 'Beloved' kaket sayaba mapang tangokba noksa nung angur.

**Kohima, Mongputeni/October 19, 2021 (TYO):** Kopelo Krome-i züluba 'Beloved' kaket Hombarnü De Oriental Grand, Kohima nung MLA Khriehu Liezietsu-i sayatsü. Sangro balala aliba kaket (Beloved) ya PenThrill publication ajanga adoktsü, ta sangdong ajanga ashi.

Krome ya taoba mapang osangbener ka aser Kohima Press Club indang advisor ka lir. Iba kaket sayaba sentong nung MLA Liezietsu-i, Krome ya tasa tajung/tasen amshia inyakba dang masü saka temolung nung aliba ajak lemsateper aser otsü ashir nübu tajung ka, ta ashi.

Kaket zülur Krome-i tesüiba küm aika nungi ajangshia arubatem nung ajemdaker iba

kaket zülua liasü aser tazüingertem temoatsü angutsü imlar, ta pai lemsatep.

PenThrill Publication indang Proprietor, Rita Krocha-i ashiba agi, mapang talangka nungi iba kaket adoktsü asoshi yongya aru.

Tesüiba küm ishika tejakdang Kohima Press Club senden agidang, Krome, shiba Club tir inyaka liasü, pai iba kaket atema typewriter nung tepor junga ajenzüker aliba maparen tem sayu, ta lai ashi.

"Pai (Krome) züluba sangro tem junga azüingdang, iba ya art maparen tongtipang ka ta kü molungjang nung tejembiba ka ait," ta Krocha-i ashi.

PenThrill Publication nungi adokba kaket tem rongnung "Beloved" ya kaket 43buba

alitsü.

Mapang talangka nungi jembia aruba Naga yimtenren onük/tebilemstü tem temai jateta adokba tensatem nung Krome-i lidanga aser ajangshia aruogo. Krome-i sangro timbaka 80s' tatemlen aser 90s tetenzüklen tatalokbatem nung ajemdaker zülugo, koba tawa tanü asen chirnur timba kati item tatalokba indang mejangjai mesüra khenyongi mangashidang alitsü akok.

80s' tatemlen aser 90s tetenzüklen züluba kaket - Beloved nung Naga nung dak sendakba nung ajemdaker sangro balala dena lir, kong yimji-yimjung aser nüjiso meimba Naga nungeri taoba küm aika tejakdang alimai mamatetsüsa aser otsütsüsa timtem jenti ajangshia aruba indang otsü tem ashir.

"Beloved" kaket züluba dak sendakba nung jembiba mapang, Krome-i, "Tebilemba dak rangloker itemji asadanga otsü zülua liasü, saka 1987 küm August 15 nü Kohima nung adianu (brother) Zekope Krome tepsetba sülen kü maparen aser teshisadangba ajak melenshiadok," ta ashi.

Iba lendong ataloker külen nungi, ojang ishika dang süaka mapang shia ni otsü tem temolung agüja zülutsü tenzük, ta pai ashi.

Krome-i, "Iba kaket azünger kati kechiba longkak aitba aser mangyim/tejashi indang dang bulua adoktsü/zülutsü ta ratama bilemstü akok," ta ashi.

Kechiyong, taküm liyonga arudang kodanga mamatetsüsa timtem tensa tenük agi anguba, tejashi aser nisungi nisung ashioktsüba tem ajangshiba nung ajemdaker iba kaket zülü, ta pai rateta ashi.

## Assam: Nu bena aliba tetsür ka asüba sülen tebur ka apu

**Udalguri, Mongputeni/Oct. 19 (Agencies):** Assam kübok Udalguri nung arishi küm 31 tain tetsür ka nu abenba dak sendakba timtem agi asüba sülen arishi küm 54 tain kibong kumer tebur ka pua liasü. Iba teburasang ya tetsürla den medema liasü.

Tetsürla ya Gauhati Medical College and Hospital (GMCH) nung October 14, 2021 nü asü, ta ashir.

Tai tonglokja alisang ya Ganesh Talukdar ta jangjaogo.

Ganesh Talukdar ya Kalaigaon nung par kidang apu aser Hombarnü Chief Judicial Magistrate (CJM), Udalguri indang okadaki anir aru.

Court ajanga pa police ket nung anogo ana ayutsü totuyuba agütsü.

Udalguri district committee of Nari Adhikar Suraksha Samiti ajanga Tangla police station nung FIR ka benokba nung ajemdaker Ganesh Talukdar ya apu.

FIR nung tetsür temeden asoshi nokdakba tentet yagi ashiba agi, mapa agütsütsü nangzükba tetsürla ya mesüzük aser iba sülen züka merenshia liasü aser October 4 nü lar kidang nungi sama aser nu abenba dak sendakba timtem ajanga tebur nung bena aliba tanur aser tetsü ya October 14, 2021 nü GMCH nung asü.

"Asür kinungertemi onok dangi iba ken o bener aruba sülen onoki FIR ka benok," ta Udalguri chapter of Nari Adhikar Suraksha Samiti tir Runumi Bora-i ashi.

"Sür alila ya tanur bena aliba mapang junga anepalu masü aser tebur nung bena aliba kinü ya sür liasü aser tetsü ya GMCH nung temang yariba mapang asü," ta Bora-i ashi.

Iba ken o nung timi bushisüingdangtsüla aser mangyimer kibong nem ochi obendang agütsütsüla, ta lai ashi.

"Onoki Tangla PS nung IPC indang section 417/493/314/201/302 kübok ken o benoka bushisüingdangba mapang lir, aser post-mortem report ataba mapang lir," ta Tangla PS officer-in-charge Tridip Kumar Dutta-i ashi.

Saka tai tonglokja alisang Ganesh Talukdar yagibo tetsürla tena ya kibong kumer küm ka shi arur, ta ashir.



Mongulbarnü Meghalaya Chief Minister, Conrad Sangma-i Itanagar nung aliba Dorjee Khandu convention hall nung 'India/Northeast India: Issues, Dynamics and Emerging Realities' kaket sayatsü.

## Mangmetong Senso Telongjemi aitsür

**Dimapur, Oct.19 (TYO) :** Mangmetong nung senso tajung Wb.Imnakaba Imchen'er jabaso Wb.Aremchang Imchen tepsettsü merangba mapaji kanga sashia aitsür ta Mangmetong Senso Telongjem Dimapur-i tanü sangdong ka ajanga metetdaksüogo.

Tan ita October 13 nü Wb.Aremchang Imchen tepsettsü merangertemji Chakhesang nung Khezhakeno yimer K.C.Koza'er jabaso Kevechulo Koza aser Angami nung Chiechama yimer asür Neihu Zumu jabaso Keneilekuo na liasü ta parnokisa metetdaksü. Tang ama Naga nung

kibong ka chir ama kümer yimjung nung putepa alitsü merangba mapang, nisung tepsettsü merangba mapaji Naga nung loktiliba nung mapeter, anungji item lendong mapa inyaktertem nemji tapet temerenshi agütsütsüsa ozüing amertem aser obendangertemi memenui ozüing nung aliba ama nübertem taküm kümzüktsü mechi inyaksüla ta MSTM-isa metetdaksü.

Parnokisa Dimapur nung Police Commissioner kübo mitkartemi nisung tepsettsü merangertem bushia apuba aser nisung taküm kümzükba asoshi kanga pelar aser tenüngsang agütsür ta metetdaksü.

## Mkg nung govt mapa inyaktertem tenüing meshir

**Mkg.Oct.19 (TYO) :** October 21, 2021 tashi nung Mokochung district nung government office balala nung inyaker grade III aser IV regular purtem mapa "confirmation" aser "invalidation" atema temang reprangtsü asoshi office shia nung tekolak purtemi pei kübok inyaktertem ajak tenüing

October 21, 2021 tashi nung agüjang ta sangdong ka ajanga Mokochung Chief Medical Officer, Dr. R.Chubala Aieri metetdaksüogo.

District Medical amentsüba anogo, tesem aser mapang kenlir külen metetdaksütsü ta laisa metetdaksü.

## NCSU ajanga asükhu lemsatep

**Dimapur, Mongputeni/Oct. 19 (TYO):** Nagaland Contractors and Suppliers Union, Kiphire District tir Holise Sangtam mapang tatsüka shiranga arur October 19, 2021 nikongdang anojungi asüba osang angashia kanga aoksar aser jashir, ta Nagaland Contractors and Suppliers Union (NCSU), Head Office Kohima sangdong ka ajanga ashi.

alitsü aser pa asüba ajanga tawa adokba süngdaksütsü tasak alitsü, ta NCSU Head Office, Kohima nung tir Pele Khezhie ajanga ashi.

Tang mangyim mapang Asür Holise Sangtam'er kibong aser kinungertem den NCSU Head Office aser district unit ajanga dena lir.

Mangyimer kibong den onoki asükhu lemsateper aser Tulusang Tsüingremi mangyimer nem tashi tasen agüjang ta sarasademtsür. Asür tanüla teti tatem maka tesunep nung anisüingzükjangma.

Asür Holise Sangtam nem akhum agüja, October 20, 2021 nü Head Office Kohima aser district unit office ajanga shibanga mangyimba anogo amungtsü, ta sangdong ajanga ashi.

## Petrol jenjang sen 200 ajungba sülen two-wheelers timba akumtsü: Bhabesh Kalita

**Tamulpur, Mongputeni/Oct. 19 (Agencies):** Assam BJP tir Bhabesh Kalita-i ashiba agi, petrol jenjang sen 200 ajungba sülen sorkari two-wheelers asemsü agi timba kumdaksütsü jembitsü.

kumogo.

Assam nung totzü jenjang timba akumba ajanga nübertem senbong nung kongshiba meteter.

Makamaiter takum nung COVID-19 tashidak wara agi kanga mejungi kongshir alidak petrol aser diesel nung jenjang temlokba ajanga tamajungba akumer.

Mongulbarnü Guwahati nung petrol ya liter ka nung sen 101.97 agi yoka liasü aser diesel ya liter nung sen 94.43 agi yoka liasü.

Ano Assam BJP tir Bhabesh Kalita-i ashiba agi, state nung mustard lu aruba sülen mustard totzü nung jenjang ajemtsü.

"Mustard lu ayimba ruzükba sülen sorochiokdang amshiba totzü jenjang maneni ajemtsü," ta Bhabesh Kalita.

"Kodang petrol nung sen 200 meshidir, state sorkari two-wheelers asemsü agi timba kumdaksütsü atema temelaba asüingdangtsü," ta Assam BJP tekolakba, Bhabesh Kalita-i ashi.

Tamulpur, Assam nung senden ka agiba mapang Kalita-i iba o ya jembia liasü.

Osangtem ajanga ashiba agi, Assam BJP tekolakbai nübertem dang gari mamshitsü aser tetsüng ana aketba taloktsü amshitsüla.

Petrol aser diesel jenjang atuba ajanga Assam nung nübertem kanga mepelai

# Assam Cabinet-i tongtipang telemtetbatem agi



**Guwahati, October 19, 2021**  
**(Agencies):** Mongulbarnü Guwahati nung chief minister Himanta Biswa Sarma menden ser Assam Cabinet senden nung telemtetba aika agiogo.

"Hopta shia amenba Assam Cabinet senden nung onoki power tensa, MOITRI atema sen, ASRIP aser tea wages mapa inyaksü onüktem atema telemtetba aika agiogo" ta chief minister Himanta Biswa Sarma-ia shi.

Assam Cabinet-i Dhemaji district nung Sissi Tangan Tribal Belt kübok revenue villages 89 dendaktsütsü lemtet.

Cabinet-isa Faith & Culture Directorate of Indigenous and Tribal Faith and Culture, Assam aser iba kübok office tem lapoktsü telemtetba agi.

Assam Cabinet-isa NFSA Ration Cards 50 teküpok aliba

Fair Price (FP) shops shibangtsüba telemtetba meyipa rebrangshi saka amitsürtem aser specially-abled FP shop kiburtemi maneni inyaka aotsü lemtet.

Cabinet-isa distribution transformers 9,000 aser pre-fabricated compact substations (PCSS) 70 amenoktsü lemtet.

Assam sorkari power transformers 11 alitsü aser raksar aliba distribution transformers 4,200 tashi Rs 2250.08 crore endoka yanglutsü lemtet.

Assam Cabinet-isa un-electrified households 4,80,249 nem on-grid mode aser off-grid mode kübok households 71,199 nem power supply agütsütsü lemtet. Iba nung Rs 21718.18 crore endoktsü.

Cabinet-isa Anganwadi Centres 48,231 nung

electrification asütsü aser primary schools 13,120 nem Rs 2161.42 crore agütsütsü lemtet.

2021-22 tsüingda Mission for Overall Improvement of Thana for Responsive Image (MOITRI) scheme kübok Moitri Society nem grant-in-aid Rs 2120.00 crore agütsütsü lemtet.

Wildlife Protection Act, 1972 nung Section 38(X) kübok Orang Tiger Conservation Foundation Trust tentetsü aser iba ajanga Orang Tiger Reserve nung keyi aser biodiversity wazüka ayuba mapa inyaksü.

Tea Wages Labour Department-i tea garden workers tem National Level Floor Wage kübok medendaktsütsü atema telemtetba agi.

Assam Cabinet-isa Code of Wages Assam Rules, 2021 indang draft notification ka renemtsü molunga agizük.

# Barak Valley nung teloktem anema FIR benok

**Silchar, October 19, 2021**  
**(Agencies):** Bengali nung teimba ser aliba Barak Valley kübok Silchar nung telok kari Assamese oshi nung züluba poster sensatsüba atema FIR ka benokogo.

Taoba mapang Bengali dena oshi asem nung hoardings aser signposts ayu saka tang Jal Jeevan Mission ya Assamese oshi nung dang zülua liasü.

Silchar Railway Station jakdang ayuba hoarding nung nisung kari apu bener ao ink tanak agi nübangtsüba indang video ka kanga prokshir.

Iba video nungsa 'Bangla Likhun' (Bengali nung züluang) ta züluba angur.

Hombarnü Silchar Sadar station nung FIR ka benokogo aser aibelenertem merenshitsu, ta police ketdangsur Kaur-ia shi.

Sorkar advertisement ka nung Assamese oshi dang amshitsu lemtetba atema Barak Democratic Yuva Front lennir Pradip Dutta Roy-i asüingdang.

1960s mapang oshi amshitsu atema lungkak aitba sülen official language ama Bengali oshi amshitsu telemtetba agia

liasü. Trinamool Congress lennir Susmita Dev-ia iba inyakyim magizüker ta shiogo.

Silchar Railway Station jakdang Assamese oshi agi züluba Jal Jeevan Mission indang awareness poster ka ayuba anema Deobarnü telok aikati lungkak ait.

Sorkari züluba poster nung Assamese oshi agi züluba ya 1961 language pact alema lir ta Barak Democratic Youth Front (BDYF) aser All Bengali Students Youth Organisation (ABSYO) ajanga aitsür.

**Piles Anepaluba** - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item limtem nungi junga taneptsü mangu. Ajsuaka, tang **Kabiraj H. Umar Chesam contact no. 8416087414 / 6909717178 National awardee H. Umar Chesam**  
**Address: Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsüingda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**  
**Yours sincerely - Tily Kath Rengma, Add: Wokha**



# Mizoram nung 'all mask campaign' atsülanger

**Aizawl, October 19, 2021**  
**(Agencies):** Mizoram-i state October 11, 2021 nü "all ajungalen "all mask campaign" mask campaign" tenzük aser alitsü metetdaksüogo aser iba ibaji October 20 tashi ta ya October 31 tashi asütsü ta mezüingbo mapang latet saka sorkari metetdaksü. October 31 tashi atsülangogo.

Hombarnü deputy "All mask campaign" atema onüktem:  
# Chiyungdang dak alaka  
# kilong nunga mask enoktsüba.  
# Table ka nung külemi mener mechiyungtsü.  
# Office/mapa inyakdak ajak nung mask enoktsü.  
# Teka metsüktsü aser sanitizers amshitsu.  
# COVID-19 inyakyimtem benshitsu.

Mizoram nung Covid19 anema tanen makai inyakba atema Dr. R. Lalthangliana-i ketdangsurtem dang pelaba metetdaksü aser pei pei district nung maneni inyaksü

# Oct 1-13 tsüingda RPF-i Rs 9 lakh alang ganja apu



**Guwahati, October 19, 2021**  
**(Agencies):** Northeast Frontier Railway (NFR) indang Railway Protection Force (RPF)-i October ita tom ka tashi nung Northeast nung ozüing aleva shibelenba mozü aika puogo.

"NF Railway nungi RPF sepaitemi October 1 nungi 13 tashi nung Rs 8.94 lakh alang ganja seret 89.45 puogo" ta NF Railway-i metetdaksü. RPF-isa October 1 aser 9 tsüingda NF Railway indang station aser train tem nung Rs. 5.54 lakh alang ganja seret 55.45 ngutet.

Taküm September ita nunga RPF-i Rs 42,39,400/- alang ganja, heroin aser brown sugar pua liasü.

# Bangladesh nung tensa majungba atema Tripura nung security akangshir

**Agartala, October 18, 2021**  
**(Agencies):** Bangladesh nung kin o kin tsüingda mangatettep adoka raratepba sülen Tripura sorkari security akangshiogo.

Tripura ajungalen aser talisa India-Bangladesh arrtsülen security akangshiogo. Tripura nung India-Bangladesh arrtsü anasa aliba superintendent of policetem dang kümdanga anüktsü shiogo.

Bangladesh nung nisung kari Hindu nunger ki 29 shi ka rongdoktsü, ta osang ajanga ashi.

Social media nung mezüingmeshiba post ka asüba atema ki rongdoktsü ta osang ajangasa shisem.



Hamro Sikkim Party nung Vice-President DS Limboo-i tanü party toktsüba sülen Sikkim Krantikati Morcha nung züingsem akümdang agiba noksa angur. Mintokgang nung SKM party president aser Sikkim Chief Minister, Prem Singh Tamang-i pa pelaa agizük. (Gangtok, October 19)



## TIR YIMYIM YIMOBILEM (EDITORIAL)

DIMAPUR RASEMNÜ, MONGPUTENI(OCTOBER) 20, 2021

### Kaketreju nung ATMA anioktsüla

**A**lima nung kaketreju lapokba nükjidong ya nisungtem dang zülutsü aser azüngtsü angazükdaktsütsü asoshi lir. Ajisüaka, nisungtem asoshi zülutsü aser azüngtsü angazükba tatabang masü saka tetenzüker dang, kechiyong zülutsü aser azüngtsü sayuba aser angazükba nükjidongji tebang o agidang masü saka zülü nung shisatsü aser temetetba lemsateptsü aser itemji mapa kuma inyaksü asoshi lir. Item nükjidongji ataloka tanübo asenok aika kaketrejui aotsü maongka ngua zülutsü aser azüngtsü meteta kümogo aser iba jagi mapa inyakdak tesem balala nung mapa ngua inyaker. Ajisüaka, asen lima nung lapoka akaba kaketrejitem nung mabensa kaji, azüng-zülü meteta kümer külen teka aser tekolok amshia pei jangraba aser nübortema teyari angutsüsa nüngdak mapa inyaksübo mesayur. Ibayongji, tanü kaketrejitem nungi züngtettertem ya pei azüngba yari dang mapa inyakdi süra, office nung tangari inyakba mapatem indang dang jembitsü aser zülutsüba mapatem dak alaka peisasa inyaketba mapabo kecha makaser arishi atemtsüba purtem lir. Aji oda, asenok aika azüng zülü shir office tapu balala nung ita sen chia inyakba mapatemji tular tema aser tilartema mapabo kasa, ajakji clerk mapa dang, tangari inyakba indang zülutsü aser itemji prokshitsü. Tanü, tia junger majungka, item mapatemji ajaki arishir aser taküm piyong item mapatemji inyaker. Ibayongji, mapa agi matar. Ajisüaka shitakba alima nung nisungtem taküm alitsü asoshibo item clerical mapatemji masü, saka nisung kati pei teka aser tekolok amshia nisungtem asoshi tagitarutsü aser tachitajemtsü yanglutetba aser züsentetba mapatemjiang asütsüla. Iba nüngdakji reprangteta aiben asen lima nunga akhidang kaketreju lapok tenzük dang nungi tanü tashi kaketreju nung sayubaren ya tajungba kuma, kaketshir tekaji zülutsü aser azüngtsü atema dang masü saka langkabosa yanglutetba aser züsentetba teka asütsüsa sayutsüyim tasen bendenloka tenzüksü asoshi jembir aser atangji, itemji tangsa memenui mapa kuma inyaksü nüngdaker. Talisa, Nagaland ama nung, School Education department rongdak mapaji aji asütsüla. Atangji, kaketreju nung suyuyim (subjects) tasen bendenloktsü asünungji, mapa (subject) shijaji tesayur nüngdaktsü aser tesayur shia nemji ita sen agütsütsüsa adoktsü, anungji asenok ama sensaker government asoshibo tasak asütsü. Ajisüaka, kaketreju nung mapa inyak sayutsü atema sayuyim bendenlokaka government asoshi khuret tuluka masütsü atema, state nung akaba Agricultural Technology Management Agencies (ATMAs) ama nung alirtem shisatsü, tashitemetet aser nubo amshi nung iba jagi khen nung Nagaland sünga lanurtem mapa tapu balala inyaker tem adoktsü. ATMA purtemi tanga lanurtem dang shiruru metsütsü, alu ayimtsü, chiyongtsü yanglutsü, chuyongtsü aleptsü aser ayoktsü indang mapa tapu jenti sayur. Item ajakji tangazüknuksüka aser kanga nüngdakba mapatem lir. Shidi asünungbo, kaktereju nung chubatem otsü kar angazükba dang nungibo item mapatem rongnung pei jangraba mapa ka angazük tajungba aser ajak atema tajangzük tuluba asütsü. Aji oda, state nung inyakyim kar melenshir, Agriculture, Horticulture, Fishery, Animal Husbandry aser Industries amala department-tem nung inyaker tem ya tesayur kümer kaketrejitem nung sayudaktsü nungbo tesayur aser tangazüker na prongla asoshi jangratemtsüka aser tajangzük tulu asütsü. Atangji, tang amai tesem tesem nung oagi ATMA purtemi lanurtem dang mapa inyak sayubaji junger, ajisüaka iba wadangji ulushia yanglur, mapa inyaker tem küm daksütsü purtemji yimtak yimtsüng nung alir lanurtem dang masü saka kaktereju nung alir kaketshirtem yur inyakra, iba jagi Naga nung tazüngtertem ya mapa bushir masü mapa inyaker aser mapa agütsür küm adoktsü. Ashiko, ibajiang tangar state-temia asenok dang nungi ajizüka inyaknuksüka akok.

## OLEMSABANG

### LGBTQI+ Tebilemstsü aser Tanü Lokti

~ Matsüng Longkumer

(Yashi adok nungi...)

(d) Lim sobaliba aser alima sobaliba

LGBTQI+ temeten indang jembidang lim sobaliba aser alimai sabuba sobaliba (popular culture) na aiben tsükteper. Ano aikati LGBTQI+ indang jembidang parnok kibong küm daksütsü asoshi jembir amai dang bilemer. LGBTQI+ tebilemstsü nung kibalembutsü ya kongsang tila kadang. Parnok kibalembutsü indang yabo asen sobaliba akangshia aser Lai tesayuba tim agüja nok dangtsüla. Naga nung sobaliba takang aser Lai tarok sayuba, LGBTQI+ ministry balala ajanga same sex union nok dangtet ta alima dang sayutsüla ta sensaksemer kati ashi. Aji süaka parnok tim temeten menok dangtsüla. Lokti tentet, Arogo, sorkar mapa aser yamala ajak sakuku temeten agütsütsüla. Asen lim (Naga tribal context) tendak kechi ataloker aji kanga junga bushiteter külen kechi koma leni aotsü aji benzü tajungba ta lenir tajung kati shia liasü. Iba benzü dang asen sobaliba nung kechi temeleshitsü ali aji entoker LGBTQI+ rogoa satoka shilem agitetsü leman asameyangtsüla.

**Arogo teinyaktsü**

**a. LGBTQI+ tebilemstsü nung Arogoji Arükhudong akümstsüla**

Tongpang nung noktakang shibai tama apusor parnokji junglunger. Iba LGBTQI+ tebilemstsü nung ya asen lima nunga shibai tama apusor ajia kanga tongtibang ta bilemer. Iba tebilemstsü ya alima lokti (secular) aser Arogo (religious) rongnung shibai tama jembir? Shiri tama iba onük bener arudir parnoki angatetyim ajanga amokbangtsü. Arogoi rakmoka aser Lai-i aginüba/tesayuba nung iba LGBTQI+ ya angatetnura alima lokti-i (secular) mamokpang dang Arogoi tama jembir tenzüksüla ta sensaksemer kari ashi. Lai tesayuba nung ajemdaker arogoi iba tebilemstsü ya mejembir toktsüra alima lokti (secular ideology/worldview) ajanga amokbangtsü aser tesülenbo Arogo tesayuba aitsü/agütsütsü leman temesü akümstsü. Tat.agi, alima lokti tentet leniba nung iba tebilemstsü ya bener ora shi metet tebur o tebur na tetsür o tetsür na kibalembuba (same sex marriage) ji asen Naga nung lokti nung agizükdi ta adoktsü akok! Iba olaji tesashi kümerang arogo apusora menur alitsü. Anungji Arogoi iba tebilemstsü ya kanga aroka teküraba nung ministry tenzüksüla.

Arogo ministryji nisung tajung ishika anitener kotaki aotsuba tebilemstsü nung matemtsüla, saka temenen nisung tulutem Khrista dangi anitentsü nükjidong sür inyaksüji ajak dang tongtibangtiba lir ta sensaksemer kati shia liasü.

**b. Taneptsür Arogo**

Arogoi parnok tanela, sobaliba, loktiliba nung shisa rama-a okrongba ya angateta taneptsüba ministry tenzüksüla. Aitsütsü melen sadoka pelaa agizüka tanela chiyungtsü den tesünep agütsütsüla. Tenyartem Mapa 8:26-38 tashi nung Filip-i Ethiopia nung teyangluba nisung ka temulung meyipdaksür baptitsüba ama Arogoi iba mapa inyaksüla ta lenir kati ashi. Asenoki ya metetdi teyangluba nisungtem Tsüngremi maitsür saka parnok asoshi nüngshi ka, aser tenung ka kü kidang aser kü jara kübok parnok nem agütsütsü ta ashir (Isaiah 56:3-5).

Tsürabur dang, medemer dang parnok koda angateta meima yaritsü tesayuba agütsütsü arogo khuret lir ta lenir aikati shisema liasü. Lokti sendokaka Khrista dak teimla lir ta tesayuba arogoi agütsütetsüla. Parnokjia Tsüngremi yanglu aser meimer aser parnok atema dena Yisü kangki nung asü. Alima meimchir dak sentakba tebilemstsü ajak madak taneptsüba (healing) ministryji Khristar Arogo ajanga inyaksü tongtibang ta angtetta ministry inyaksüla ta aikati ashi.

**c. Tenla ki nung parnok shilem**

Arogo/Tenlaki ya temeshipur sendendak masü saka temenen pur tekümzük angudak ta angateta parnok-a satoka shilem agitsüsa asameyangtsüla. Nisung ajak temenenpur aser kodaki atutsü renemertem lir. Anungji tekülemdak parnoka satoka pei temenen nangzük Kodak lima ajangzük tettsüsa külemdaki parnoka anioktsüla. Ki shibanga yur arung ta ashi nung koda sür aitettsü ta kari shisem.

Traditional sentep kidang satoka mekülemtetba aser shilem magiteter, saka tanela nungbo Tsüngrem den tesendaktep tajung yuner. Anungji Dimapur nung parnok temeja sentep agiba osanga lir.

**d. Lai O tesayuba shitak agütsütsüla**

Khristan lokti aser Khristan ka lenibaji Temeshi Lai ya lir. Lai-i kechi ashir ta mezüng asüng dangtsü nüngdaker. Saka iba tasüng dangba langzüdang Temeshi Lai züluba tensa (context) ji tama rajema metetsü nüngdaker. Iba Lai züluba tensa nung loktiliba, sobaliba, yimsü-yimpong, rongsen ketzung aser tanelaren koma liasü aji angatet nung dang Lai O taginüba rajema angatetsü. Laishiba ya tensa balala nung züluba lir. Iba ya mangateti aiben asenoki Lai tekong joka joka agiteta metentsü meranger (proof text). Iba den külemi Laishiba züluba oshi (original language) den medemdanga Lai tesayuba agütsütsü nüngdaker. Tat.agi Tebur o tebur na medemba indang jembidang yakta Sodom aser Gomora (Lipok 19:1-9) ya bener arua metentsür. Saka kodang Sodom aser Gomora samatsüba ya bushidir tebur o tebur na medemba dang masü tashiyim amshiba temenena lir ta angateter.

**Otem**

LGBTQI+ mesüra jentoka alirtem indang ya asen lokti nung onük tasen amai benshir. Liyonga aodang iba ya tuluba akümstsü. Tanü pei temeten amshinüba tensa nung asenok alir. Yangji Lai tesayuba, sobaliba aser item tebilemstsü tasentem külemi ajurtepa tangatetba kati arutsü asoshi bushitsü nungnanga malitsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



18-19th October, Assam Haflong kübok Zeme Arogotem nungi Zeme nungner missionary tem atema Missionary seminar ka Khaukang Arogo nung takok ngua agiogo. Iba sentong nung Mr. Olem Jamir, Director, Cross road , ministry ajanga "Samaba tanelatem koda Yisu Khrista dangi anir arutsü" ta asüba sayuyim aguja liasü.

## Myanmar aser Afghan nungi tanurtemi yimjung atema sarasadem

**October 19, 2021:** Tawa Myanmar nung sepaitem aser telok balala tsüngda raraba ajanga Khristantem kanga timtemba mapang ka nung October 18 nü alima tesem ajungalen yimjung atema sarasademba sentong ka nung Myanmar nung Khristantemia shilem agiogo.

Tanur million kati yimjung atema sarasademba sentong ya Aid to the Church in Need (ACN)-i October 18 nü ayongzüka liasü.

Taküm iba sentong nung Myanmar aser Afghanistan na nungia tanur 181,000-i shilem agi.

Taküm iba sentong agitsü atema ACN-i oshi 24 nung sarasadem onüktem agüja liasü.

Yangon Arogo nung

tanurtem atema missionary-i Khristantem dang October 18 nikongdang 3:00 ako nungi iba sentong nung shilem agitsü ayongzüka liasü.

Myanmar nung putir kati ACN dang, "Joko tesüiba ita ishika tensa kanga mejungi arur. Onok aliba tesem nung coronavirus wara tensa kanga majung aser yimtsüngtem shibanga lir. Anogo shia sarasademba ajanga shi aser tanela naprongla nung tashi itdaktsür. Onok Arogotemia nenoki ayongzüka sentong nung shilem agitsü aser nenok atema-a sarasademtsütsü. Nenoki tebilemstü katsüba, temeim sayuba aser yariba atema kanga pelar," ta metetdakja liasü.

Taküm February ita nung Myanmar sepaitemi

democracy lenirtem apuba sülen nungi tenzüka tensa mejungi arur aser tang iba linük nung civil war adoktsüsa lir.

Talisa Khristan nütsüng aika aliba Chin, Kayah, Kachin aser Karen state tem nung rara ajanga nisung meyrjang aika jenshiogo. Sepaitemi Tenla ki aser ki aika raksatsür mesüra rongdoktsür; sepaitemisa pastor den putirtem anema inyaker.

ACN International spiritual assistant, putir Martin Barta-i, "Linük aika nung rara aser reshikangshi ajanga nürburtem, talisa tanurtem taliba timtemer, anungji sarasadem campaign ya tanurtem longjemer sarasademtsü atema maongka tajung," ta metetdakja liasü.

## Haiti nung puer aoba America nungner missionary tem bushidar

**Washington D.C, October 19 (Agencies):** October 16, 2021 nü Haiti nung Christian Aid Ministry mapa inyaker America nungner missionary aika puer aoba sülen Haiti ketdangsertemi parnok bushi tenzükgogo, ta International Christian Concern-i metetdaksü.

Missionary temji orphanage ka semdangba sülen meyipa aoba mapang nung Ganthier nung 400 Mawozo Gang-i apu. Iba tesem nung mapang shia Mawozo teloki rakzükrakter, gari auyar aser nisung puer aoer.

Christian Aid Ministries-i sangdong ka ajanga, "Honibarnü, October 16 nü orphanage ka semdangba mapang Christian Aid Ministries nung inyakerter puer ao, anungji parnok atema sarasadem nung bilemtetdaksüner. Onoki Tsüngrem dang sarasadem aser ketdangsertemia onok den yaritepdar," ta metetdaksü.

"US nungner 16 den Canada

nungner ka densema puer ao. Parnok, parnok puer aoertem, parnok kibongtem, medemertem aser Arogotem atema sarasademjang. Iba tatalokba dak sendakba nung telemtetba agia inyakerter atema sarasademjang. Organization ka ama onoki iba tensa ya Tsüngrem ket nung dang toktsür aser Pa dak tamang akar. Yisu Khrista tenüng ulutsür aser nisung aikati Pa temeim aser tekümtet jangjatsü atema sarasadem," ta kasa sangdong nung shia lir.

Osang angazükba agi, America nungner rongnungji kati WhatsApp ajanga teyari meshiba osang ka yoka liasü. "Yimlibilema onok atema sarasademjang!! Parnoki gari anisang densema onok puogo. Parnoki onok koloni anir aotsüar onoki memetet," ta missionary kati metetdaksü.

Taküm July ita nung Haiti Tir, Jovenel Moise tepsetba aser August ita nung menoknok lendong atalokba sülen nungi linük nung tensa kanga mejungi

kümogo. 400 Mawozo telok yagi akhidang nungi tamanger teloktem anema inyaker.

Taküm April ita nunga Haiti nung Khristan putir pongu aser nun ana puer ao aser September ita nunga deacon ka tepset aser pa kinüngtsü puer oa liasü.

ICC Tir, Jeff King-i, "Tawa Khristantem puer aoba atema onok mepelar. Onoki parnok den parnok kibongtem atema sarasademtsüdar. Taküm Haiti nung tayongzüka jenti ajurur aser item rongnung Arogo aser ministry anema inyakba densema lir. Linük aika nung ministry mapa inyaker staff tem puer aoba kanga bulua ataloker aser US kidanger linük Haiti nunga item ama tatalokba osang angashia onok mepelar. Onoki US ketdangsertemi tang iba tebilemstü onük atema inyaktsü mepishir aser religious freedom atema inyakerter danga Haiti nung telok balalai tamangertem anema inyakba tebilemstü atema inyaktsü mepishir," ta metetdaksü.

## ANOGO ABEN TSÜNGREM DEN

### Teti Amangang, Tatem Maka

*Tsüngrem temeim lir, aser shibai Tsüngrem temeim nung alir, pai Tsüngrem dak alir.*

1 Yohan 4:16

Yohani tabensa temeimji kechi rasaa ashir. Pai ashi, "Temeim Tsüngrem nungi lir" (t.7) aser "Tsüngrem temeim lir" (t.8). Kechiba Khristantemi meimer Pai kuli pungu ratetta agütsür:

- 1) Temeim Tsüngrem nungi lir
- 2) Shidakba tabensa Tsüngremer temeim anidaktsü, bendanga agütsüba temeim
- 3) Khristan kulisüba teyongtsüji temeim
- 4) Temeimji Khristan teti tatem maka tejangja tekümtet lir, aser
- 5) Obendangba anogo nung temeimji Khristan temulung alemdak lir.

Yangi "alir" ta amshiba O tetezüji "iba nung mapang indokba" lir. Teti amangba tetezü tatem maka taküm nung bendanga agütsüba. Kati bendanga agütsü nung pai/lai Tsüngrem O zünga, bushia aser maneni sarasadema Tsüngrem den mapang entokbaji dang masü, saka anogo tepiyong tia ajak nung Tsüngrem lir ta metetta süidaktsüba lir.

Iba tapu ajunga nung asenok kati ka den meimteptsü ajungshia zülu. Kechiba? Kechiaser asenok metemsüaka Tsüngremi asenok dang meim. Anungji asenoki kati ka den koda meimteptsü? 1 Korint 13 bilemtetang. Temeimji taremsük, anükalem, tenük mememer... ochi nung pelateper, ajak aremer, ajak amanger, ajak yimlar. Temeim kodanga majener. Shibai tangar meima alir pai/lai Tsüngrem den alir. Asenok aseni ajururtem den temeim jakla sayutsüla. Asenoki yamaji inyakdang Tsüngrem asenok den alir.

Oba, Ne temeim teti kü den aliba asoshi Ne tenüng asanger. Ni tanü ne nem bendanga agütsüdakjang. Amen.

## Kayah State nung sepaitemi injang agi Tenla ki ka khasatsü

**October 19, 2021:** Myanmar Tenla kitem aser kinüngertem kübok Kayah state nung kidang jenoka lir.

sepaitem- Burmese Army Taoba ita National Unity (Tatmadaw) aser local defense Government (NUG)-i forces na tsüngda raraba Tatmadaw sepaitem anema mapang nung sepaitemi shells tesashiba raratsü ayongzüka aser injang agi Tenla ki ka sülen Tatmadaw aser Karenni Army tsüngda tang tesashiba International Christian raradar.

Concern-i metetdaksü. Taküm May ita nunga October 13, 2021 nü Kayah sepaitemi Kayan Thaya State kübok Phruso jila nung yimdak Catholic Tenla ki, sepaitemi shells aser injang agi Demoso nung St Joseph Arogo Tenla ki aser Kayantharyar nung Sacred Heart Arogo Tenla ki maaka liasü.

Kayah State nung Catholic Arogoi temelungertemi tenla agütsüba ajanga rara ajanga jenshia alir nisung 300,000 shi yaridar.

Assistance Association for Political Prisoners-i ashiba agi, taküm February ita nungi sepaitemi yimsüsüba tenzüka sülen sepaitemi nisung 849 shi tepsetogo aser meyrjang aika puogo.

Loikaw Arogo nung putir, Francis Soe Naing-i, Tenla ki amakba mapang nungji putirtem jena ao, ta metetdaksü. Taküm May ita nungi tenzüka tang tashi nung Association of South-East sepaitemi Catholic Arogo Tenla ki pongu raksatsüogo. Myanmar sorkar dang yimtenren dak sendakba nung pua alir ajak chioksüla, ta jenshiogo aser parnok aika

Rara ajanga Loikaw Arogo kübok nisung 100,000 dak tema metetdaksüogo.

**OLONG PAITEP # 5971**

1		2			3		4		5
				6		7			
8									
						9			
				10					
11									12
					13			14	
15									
16									17

<b>TIPLÉN</b>		<b>LANGTSÜNGLEN</b>	
1. Nüji masü	- (4)	1. Jila tulu	- (5)
3. Techinütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anügdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

**OLONG PAITEP # 5970 TELANGZÜBA**

<b>TIPLÉN :</b>		<b>LANGTSÜNGLEN :</b>	
1. Tesangra, 5. Mungo, 7. Kisen,		1. Temesen, 2. Raksa, 3. Aon, 4. Aso,	
8. Salem, 12. Semki, 14. Kilem,		6. Nile, 9. Alizüng, 10. Omen,	
15. Kensü, 16. Sangpang.		11. Lemta, 13. Ola, 14. Kin.	



**ALOKBAI NÜBURTEM DANG SAKSALEMA ALITSÜ YIMYIM AYIMOKTSÜR**

- \* Ohooiii.... Naga nunger senso yimtsü-yimbo-i anir.... watsü wabong.... lanu-ain ajak...
- \* Tanü putu nung ....shirnok....chira-peraa...kümdanga...meita melilir....ashioktsütsü...
- \* Sorkar mapa agutsütsü ta ser sen merijang/lakh aika meshir...Tiyazü appointment order shitakba amai renemer agutsür lir-ko...yamala sang nungji mashitsü kümdangang niiii...
- \* Tsüngrem'er tanula temeshi ainkar aikati tashitak aneptsür....Tsüngrem'er shin o-tem... ajanga tamangertem kümzüker...ajisuaka ano tiyazü ainkar-a lir-ko...kümdangang niiii...
- \* Doctor tajung aikati tasütsüba jenjang nungi taküm aika kümzüker...ajisuaka ano tiyazü
- \* Doctor-a karbo lir-ko...parnok jagi Doctor jilo-ia nubur ashioktsür...Kümdangang niiii...
- \* Arasener Kopiraz tajung aikati... nisung taküm aika tasütsüba jenjang nungi kümzüker...
- \* Saka ano tiyazü arasener kopiraz jilo-ia sen meshia senzür-a lir-ko...kümdangang niiii...
- \* Temang maliz asür, teret/tezü yanglur-a ta shia arur maliz asüdang... amuo aotsü mozü amshia sümanga odaktsür...kidang osettsüset ajak auyar aor lir-ko...kümdangang niiii...
- \* Bazar nung shishidang...town nung senzüdang...nisung nungtepa alidak kümdangang...
- \* Azük-angodi (Chain & ring) alozüka/ayar...pocket amour lir-ko.... kümdangang niiii....

~ Lilir : L.Kika Pongener.

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimym

**Lasüng**

(n) aon aser lon nung teronem menemtsü, beyas mesükba aonsutsü (garlic)

\* **Lasüng** achiba agi temang nung teyari aika agütsür.

**Latet**

(v) ken o lemtet ( resolve)

\* Pei alidak shingaiia plastic mamshitsü ozüng **latet**.



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

**Tepela Tasoba Anogo**



1. Tenüng : .....
2. Tasoba anogo: .....
3. Küm : .....
4. Class : .....
5. School : .....
6. Talidak : .....
7. Salem osang : .....

**TANÜBO NAI LANGZÜANG**

**Q. Shibai Doon Drone Mela lapoktsü?**

- A. Jyotiraditya M. Scindia
- B. Ashwini Vaishnav
- C. Kiren Rijju
- D. Anurag Singh Thakur

(Taruba adok nung onoki langzüksü)

**YASHI ADOK TELANGZÜBA : 19**

**SUDOKU # 6012**

		3		1	5	7	9												
	8	6				9	2		1										
				2	6														
9	2	4	6																
		7	4	3	1	8	2	9											
	1		9			6													
7			5	9			8	2											
	3	5		8	2														
8		2		7	6	4													

**TELANGZUBA # 6011**

		8	4	9	2	7	1	6	5	3									
	6	7	5	3	8	4	9	1	2										
		1	2	3	6	5	9	7	4	8									
9	2	4	6																
		7	4	3	1	8	2	9											
	1		9			6													
7			5	9			8	2											
	3	5		8	2														
8		2		7	6	4													

**OJANG LUTEP # 5557**

- MOLTEUNG :
- AKAJ :
- IAG :
- SAADERASMA :
- IRMESHA :
- TEMSÜSOATANG :
- RETSÜNGMI :
- ENAS :
- ENM :
- AGÜTSÜTSÜ :

**OJANG LUTEP TELANGZÜBA # 5556**

TEMEYONG MEMEDEMBAMA AMA LOKTI NUNG NISUNG SHIA TEBILEMBA BALALA ALIR

**TAN HOPTA ATEMA - KOMA SÜLA ?**

Q. Tang amai Nagaland nung oposition telok mali ser assembly election agitsü mapang tonga arununga koma süla?

Olong 20 shi nung October 22, 2021 tashi nung iba telangzüba ya onok dangi (e-mail - tiryimym@gmail.com) : (SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.

### Uttarakhand: Anentsüh aser tzümetsüing lendong nung nisung 16 asü



Uttarakhand Chief Minister Pushkar Singh Dhama-i state nung tzu agi metsünger aliba tesemtem anüing nungi asadanga noksa nung angur.

**Dehradun, Mongputeni/ October 19 (Agencies):** Uttarakhand Chief Minister Pushkar Singh Dhama-i Mongolbarnü sangdong ka ajanga, tzunglu kanga sashia aruba ajanga lendong balala atalokba nung tanü nisung 11 süogo aser ajak senteper nisung 16 süogo, ta ashi.

Paisa, tekümzüba maparen balala inyaksü atema Kumaon aser Garhwal tesemi Indian Army indang chopper asem yokogo. Ganga, Gola, aser Kali densema ayong tongtibangtem lendong temaitsü agüja aliba adena tur yimdar aser ayongküm nung aliba nübürtem aninogo, ta ashi.

"Tanü nisung 11 süogo aser yashi tatalokba ana nung nisung pongu asü. Asürtem ya timba Nainital nungi lir. Tekümzükertemi kanga

meranga inyakdar. Onoki India Army dang teyari meshiogo. Kumaon nung Army chopper ana aser Garhwal nung ka yoka lir," ta pai ashi.

Uttarakhand Metrological Centre-i Bodhbarnü nungi tenzüka tsüingsang tajungba akümtsü ta metetdaksüogo. Kumaon nung küm 124 sülen taküm tzunglu tesashitiba aruogo aser taoba ghonda 24 tsüngda tzunglu 500 mm dak tema arua liasü.

Kasa mapang nung Meteorological Department (IMD)-ia October 17 nungi 19 tsüngda tzunglu kanga sashia arutsüba takzür liasü. Ajisüaka Garhwal nung tsüingsang tajungba kümogo aser Kumaon kübok Nainital, Almora, Pithoragarh, US Nagar, Champawat, aser Bageshwar district tem nung tzunglu kanga

Iba sentong kübok anti-larva exercise aser awareness sentongtem

sashia arudar.

Nainital yimti nung awatsüing moshia ayimba sülen lenmang ajunga metsüngogo aser iba ajanga alima penzürtem taolen makai aküm. Ramgarh, Dhari, aser Garampani tesem tamajungtiba kongshir lir. Linük ajunga den Nainital yimti sendaktepa lenmang asemprongla anentsü agi anenbangba sülen lenmang ajanga tesendaktep raksaogo.

State Disaster Response Force (SDRF) team tem tanep iba tesemi yokogo kechiyong tsüingsang tamajungba aküm aser nübürtem pei ki toktsür aotsüsa aküm.

Iba dak sendakba nung Ato Kilonser Narendra Modi-i Dhama den tensa asadangsü atema sensaksemogo.

Uttarakhand Disaster Mitigation Minister Dhan Singh Rawat-i ashiba agi, sorkari Char Dham pilgrimage bo menokdang ajisüaka pilgrims tem dang tekümzüba tesem bushia jenoktsü tetuyuba agütsüogo. Uttarakhand ketdangsürtemi Chardham pilgrim tem dang Deobarnü tashi nungbo Haridwar aser Rishikesh tonga arutsü aser tsüingsang tajungba maküm tashi Himalayan temple tem bushia maotsü metetdaksüogo.

Maneni tzunglu ajanga tenem nung aliba tesemtem nung power aser water supply dak kongshiogo aser lenden nung aliba Rudrapur aser Gadarpur tesem nunga tzu metsüngdar.

### Jaishankar-i IAF Contingent semdang

**Jerusalem, Mongputeni/ October 19 (Agencies):** External Affairs Minister S Jaishankar-i Mongolbarnü, Israel indang Ovd Airbase semdanga linük ti nung adenshia Air Force indang biennial Blue Flag exercise nung shilem agia aliba India nung contingent semdangogo.

Iba sentong nung Indian Air Force (IAF) personnel 85 den Mirage 2000 fighter aircraft pongui shilem agidar. Mirage 2000 fighter aircraft ya French aircraft indang latest updated technological version ka lir kong advanced avionics aser weapons systems inokja lir.

US, UK, Germany, France, Italy, Greece aser Israel nungi sepaitemi iba sentong nung shilem agidar aser taküm mezüngbuba F-35 aircraft-ia iba sentong nung shilem agidar.

Search & rescue operations densema special operations capabilities aser cross border counter-terrorist operations

ajungkettsü nükjidong nung 2017 küma India-i iba sentong nung shilem agiogo.

2017 küm Indian contingent nung züngsem 45 rongnung Garud commandos 16 densema parnoki iba sentong nung shilem agia liasü. Indian Air force-i Garud commandos tem den C-130J "super Hercules" aircraft yoka liasü. Blue Flag drill ya küm ana nung khen agir, koba alima linüktem den Israel military tesendaktep akangshitsü nükjidong nung ayongzüka agia arudar.

India dangi prangbong injang aser hadir balala supply asürtem rongnung Israel-a densema lir. Parnoki Phalcon AWACS (airborne warning and control systems) aser Searcher, Heron & Harop UAVs (unmanned aerial vehicles) nungi Aerostat & Green Pine radars, Barak anti-missile defence aser missiles balala aser laser-guided bomb tem supply asür.



J&K nungi ayaangertem meyipa aruba sülen pei talidaki aotsü atema Amritsar nung train atatepba noksa nung angur. Kashmir Valley nung ayaangertem amakba sülen parnok aika pei talidak bushia odar.

### Rajasthan sorkari Health Workers tem nem soti magütsütsü

**Jaipur, Mongputeni/ October 19 (Agencies):** Rajasthan sorkari health worker tem nem soti agütsür aliba ajak thitsüogo aser dengue o tsüingüm mongpu melenshiba mapang wara balala agi konshir aliba tesemtemi special campaigns ayongzüka agitsü atema nodal officer tem yoktsü telemtetba agiogo, ta ketdangsürtemi Mongolbarnü ashi.

Official sangdong ka ajanga ashiba agi, Health Minister Raghu Sharma-i ketdangsürtem dang October 20 nungi November 3 nü tashi Dengu aser tanga wara poktetba meita atatsü atema 'Dengue Mukt Rajasthan' campaign ayongzüka agitsü tetuyuba agütsüogo.

Iba sentong kübok anti-larva exercise aser awareness sentongtem

ayongzüka agitsü atema district ajak nung 24X7 control rooms aser rapid response team tentetsüogo.

Sharma-i, Chief Medical Health Officers (CMHOs), Principal Medical Officers aser health department ketdangsür ajak den video conference senden ka ayongzüka amenba mapang tetuyuba balala agütsüogo.

(Maneni tapak 9 nung...)



Jabalpur nung Eid-e-Milad un Nabi procession ka sülen police temi mangatettep adoker aliba Muslim nungertem dang teargas khaloktsüba noksa nung angur.

### 2022 polls: Congress-i UP nung tetsür shilem 40 yoktsü

**Lucknow, Mongputeni/ October 19 (Agencies):** Tetsürtem jenjang ajungkettsütsü atema UP nung Congress party-i 2022 Vidhan Sabha elections nung tetsür shilem 40 nem ticket agütsütsü.

UP In-charge aser party national general secretary Priyanka Gandhi Vadra-i Mongolbarnü UP Congress headquarters nung iba osang sangdonga liasü. Laisa, lai mulungba ama dang inyakra lai ticket tesadakabo tetsürtem atema mekazütsüla, ta ashi.

November 15 tashi nung menden balala atema apply asütsü atema tetsürtem jaoka Priyanka-i, tetsürtem ya parnok mapa dak ajemdaker shimsü, ta ashi. "Congress party-i 2022 Vidhan Sabha election nung tetsürtem nem ticket shilem 40 agütsütsü nangzükogo," ta Priyanka-i ashi.

Iba jenjang agiba dak sendakba nung lai, "iba telemtetba ya UP nung aliba tetsürtem shirnoki temelenshi aginer, telongjem dak tamang akar, ochi atema nokdaker aser lar kibong aser state tia tajungba ka atema meranga inyaker, parnok ajak atema lir," ta ashi. Laisa, iba telemtetba agitsü atema ajungmesoba tetsürtem tenüing kar shisema liasü.

Tetsürtem rongnung tashiyim agi raksatsüba nungi jenbortem, lendong ajangshir aliba kinungertem aser chichiba terenlok aginüba aiür chanutem densema lir.

Sorkari tetsürtem ajungkettsü atema tamakok nguogo ta shia lai, "shidakba temelenshi aginüra tetsürtem longjemer nokdaksüla.. shingaia nü jenjang memelenshitsütetsü. Nai nüsasa nokdaker jenjang agitsüla. Nisung ajaki tetsürtem kümzüka toktsütsü atema nangzük, saka inyaksü mapang agi bener arutsüba mapang nungbo parnoki na ajemdema toktsürtem nemang tekümzüka agütsür," ta ashi.

UP Congress-i tetsürtem nem menden shilem 40 mekazüka toktsütsü atema telemtetba agiba indang asüngdanga mapang lai, "ni mulungba ama dang telemtetba agir nibo shilem 50 mekazütsüla.. iba ya taruba election tem nungbo benoktsü akok," ta ashi.

Congress-i yimsü asüba state tem nung kasa inyakyim ya benoktsü asü ta asüngdanga mapang lai, "ni UP incharge lir aser onoki Uttar Pradesh atema telemtetba agiogo. Iba inyakyim ya benoka benshiyonga aotsü tetemsü," ta ashi.



Libya nungi mile 35 shi pilar Libyan SAR zone nung Sea Watch-3 team kati kumzüksü lia migrant tem ngisa agi yangluba rong tilaka nung ayaloka aliba noksa nung angur.

## Turkey-i linük 10 indang ambassador tem jaok

**Ankara, Mongputeni/October 19 (Agencies):** Lokti lenir ka chioktsü atema ayongzükba sülen Turkey-i, Germany aser United States ambassadors densema linük 10 indang ambassador tem jaokogo, ta Turkish diplomatic source kati Mongolbarnü ashi.

Parisia nung asoba philanthropist aser activist Osman Kavala (64) ya o mebandangi 2017 küm nungi tepuokdak yua lir aser iba ajanga anüolen aliba linüktem den aiben mangatettep adoka arudar.

Kavala ya 2013 küm sorkar anema longkak aitba aser 2016 küm military tashi amshia sorkar atsüngtoktsü merangba dak sendakba nung aija lir, koba pai magizüker.

Rights teloktem aser anüolen aliba sorkartemi pa pua ayuba ya tir Recept Tayyip Erdogan-i pa anemertem amokbanga ayutsü merangba temaitsü ka ta bilemer.

Hombarnü Canada, Denmark, Finland, France, Germany, the Netherlands,

New Zealand, Norway, Sweden aser US-i sangdong ka ajanga iba ken o takaratiba nung bentettsü atema ayongzükba liasü.

"Pa aija aliba ken o menoa mebantetba ajanga democracy, rule of law akhüm metsübuba Turkish judiciary system nung ochi mashi aliba ama angatetdaksür," ta parnoki ashi.

Embassy temi Turkey dang Council of Europe tetuyuba sülen anidaksü ayongzükogo, kong Turkey 1950 küm dena liasü.

Council of Europe-i, iba human rights lokti tentet senden November 30 nungi December 2 nü tashi amentsü aliba mamen tsüngda Kavala mechiokra Turkey anema jenjang agitsü ta amokmerenogo.

Kavala anema ken o benoker aliba ya November 26 nü angadangsü lateta lir.

Kasa mapang nung Turkish Interior Minister Suleyman Soylu-i Twitter ajanga Hombarnü embassy indang sangdong ya aitsüogo.

"Tang benoka aliba ken o

dak sendakba nung judiciary nem ambassador temi tetuyuba agütsüba ya agizüktsü makok," ta Soylu-i ashi.

Turkish Justice Minister Abdulhamit Gul-ia, "onok indang court nem tetuyuba mesera parnok tebilemba shidangtsü atema ambassador shinga daka temeden mali," ta tweet asü.

## Onoki hypersonic missile metendang: China

**Beijing, Mongputeni/October 19 (Agencies):** Financial Times nung sangdongba ama masü China-i July ita space vehicle ka tendanga liasü, ta Chinese foreign ministry-i Hombarnü ashi.

Ken o jangjaa aliba nisung pongu nungi osang agiba sülen Financial Times-i Honibarnü, China-i nuclear-capable hypersonic missile ka tendangogo; iba missile ya anüngtom nung alima ajunga alongba sülen target nungi mile 24 shi agi pilar

## Bangladesh nung Hindu nunger amaker noklang aika apu

**Dhaka, Mongputeni/October 19 (Agencies):** Bangladeshi police-i Mongolbarnü ashiba agi, parnoki Bangladesh nung Hindu nunger amakertem nisung 450 puogo.

Police temi lokti azioktsü merangba mapang nisung trok asü, ta local media sangdong balala ajanga metetdaksü.

Bangladesh kübok Noakhali district nung Hindu nungertemi Koran mezümgmeshia amshia ta osang adokba sülen Hokolbarnü Muslim nunger noklang aikati longkak aitba mapang iba azütokshi lendong atalok.

Iba sülen Hindu nunger tekülemdak aika raksatsüogo aser parnok talidak kia dena makogo.

Durga Puja mapang azütokshi lendong atalokba dak sendakba nung ken o 71 benoka lir, ta Bangladesh police otongdar kati ashi. Iba tatalokba nung densema alitsü ta

temulung melemer bilemer nisung 450 apuba sülen ano ken o maneni bushisüngdangdar, ta paisa ashi.

Bangladesh nung tamangba yimsü lokti balala tsüngda mangatettep adoka arudar, kong linük temzüng ozüing nung Islam ya state tamangba yimsü ta atakzükba lir, ajisüaka secularism tangatetba dena benoka inyaksangshir.

Bangladesh nung Hindu nunger shilem 10 shi lir.

Ato Kilonser Sheikh Hasina-i aniba Awami League party-i 2009 küm sorkar kümtetba sülen Bangladesh nung mepetmesü tali kümogo.

"Social media nung tesempatep osang prokshiba ajanga rongmesor adokdaksüba sülen Bangladesh nung Hindu nungertem amakba ya temzüng ozüing anema lir aser nokdakgtsüla," ta Bangladesh nung United Nations' resident coordinator Mia Seppo-i tweet asü.

anen ta sagdonga liasü. Osang kaket ajangsa iba inyakyim ajanga U.S. intelligence aoksadakja liasü, ta ashi.

"Iba ya missile masü saka space vehicle ka liasü," ta ministry otongdar Zhao Lijian-i Beijing nung osangbenertem den sensaksema mapang ashi. Paisa, iba vehicle tanaben amshitsü atema technology tendangba ka liasü, ta ashi.

Reusability test agiba ya nüburtem space-i tulu aluli ta asütsü atema tezübaba

aser jenjang dalangba kümdaktsütsü atema lir, ta Zhao-i ashiba den company aikati ibala mesükba tetendangba agiogo, ta ashi.

Foreign ministry-i ashiba agi, iba tetendangba ya Financial Times-i sangdongba ama August ita masü saka July ita agia liasü.

China indang military modernisation programme ya United States-i kanga kümküma meita atadar, kechiyong China ya parnok den tokteper tongtiba ka kümogo.

## North Korea-i Japan tsütsü missile ka tendang

**Seoul, Mongputeni/Oct. 19 (Agencies):** North Korea-i submarine nungi ballistic missile ka Japan tzükumlen tzüyim nung khaloktsü südi ta temolung melemer lir, ta South Korea indang mitkartemi ashi.

Pyongyang-i iba missile ya January ita saya liasü, koba 'alima nung tashi tulutiba nok-nü' ta jembia liasü.

South Korea-ia iba ama nok-nü ka sayar hopta ishika lir iba ya ataloker alitsü.

North Korea-i tawa missile ishika tendangogo aser item rongnung hypersonic aser long-range missile densema lir.

Item tetendangba ya karibo international sanction nung aibelener.

Iba linük nem United Nations ajanga ballistic missile aser nuclear weapon tem metendangsü tenokdangba agüja lir.

UN-i ballistic missiles ya cruise missiles dang nungi lendong tuluba keta lir ta züingshir, kechiaser ballistic missiles nungya oset tashi tuluba bener oteter aser meta talangba oteter aser tekeraba jajateter.

Mongolbarnü South Korea indang Joint Chiefs of Staff ajanga ashiba agi, North Korea anüdoklen Sinpo rongnendak tesem nungi missile ka khaloktsü, kong Pyongyang indang submarine tem amenoka lir. Iba missile ya East Sea nung tsük, koba dang Sea of Japan ta ajar.

Ibai submarine nungi khaloktsüba ballistic missile ka südi ta temolung melemer ashir.

Iba missile ya anünglen kilometre 60 shi tur meta kilometre 450 shi ao, ta South Korean media ajanga ashir.

Japan Ato Kilonser Fumio Kishida-ia ballistic missiles ana

tashi khaloktsü aser ibai kanga tesasatsüka lir, ta ashi.

2019 küm October ita North Korea-i submarine-launched ballistic missile ka tendanga tzü telung nungi Pukguksong-3 ka khaloktsü.

Iba mapang state news agency KCNA ajanga ashiba agi, parnoki dangalen nungi timtem agütsüba ajemdaktsütsü mechi missile ka khaloktsü.

Ajisüaka missile ya standard trajectory nungi khaloktsü asünungbo kilometre 1,900 shi jajatsü liasü. Anungji iba yagi South Korea aser Japan mela mela atongtsü.

Submarine nungi khaloktsüba missile ya putettsü tasakba akumtsü aser temelaba nung nükjidong tongtetsü.

South Korea-i par sasa nok-o-nü yangluba mapang ka nung iba missile ya tendanger, aser ibai Korean peninsula nung

raraba hadir yangluba nung tokteper amai lir, ta aikati ashir.

Seoul-i tan hopta South Korea indang defence exhibition tulutiba agitsü, ta ashir. Iba mapang fighter jet aser missiles amala tasen sayatsü. Parnoki ano space rocket ka yakta tendangtsü lir.

North aser South Korea ya technical tsütsü nungi tang tashi rara nung lir, kechiaser Korean War, koba agi linük ana ya sadang, iba rara ya 1953 küm armistice ka nung anenba dang lir.

North Korea lenir Kim Jong-un-i rara tanaben metenzükner, ta taoba hopta shia liasü. Ajisüaka par linük tsükchir nungi kumzükba alitsü atema nok-o-nü maneni yanglutsü nüngdaker, ta pai ashi.

Kasa mapang South Korea, Japan aser US itdangiter tekolakpur tem Seoul nung

North Korea indang jembishinüba mapang lir.

US envoy to North Korea, Sung Kim ya tang Pyongyang-i aoba mapang lir, kong pai North Korea den ken o jembishinü tanaben tenzüktsü atema sensaksem akatsü aser Korean War tatem kati aruba sangdongtsü indanga jembishinütsü.

Jelia talenba kecha makai North Korea lenir ajurutsü US Tir Joe Biden indang administration temolongetba lir, ta pai tesüiba ghonda 24 tsüngta shia liasü. Tesüiba mapang US aser North Korea tsüngta sensaksema denuclearisation nung tangatetep kati maruteti anena liasü.

US-i tenokdangba magiendang North Korea nem nuclear nok-o-nü yangluba maparen anendaktsüner, saka North Korea memolunger.

## ASCAP London Music Awards: Lewis Capaldi-i award pezü angu



**London, Mongputeni/October 19, 2021 (Agencies):** ASCAP London Music Awards 2021 sentong nung Lewis Capaldi-i award pezü nguogo.

Taküm küm indang American Society of Composers, Authors and Publishers (ASCAP) sentong nung award timba angur rongnung arishi küm 25 tain kentener Lewis ta sangdongogo. Lewis dak ken zülutsü aser ken mejemtsü sempet tajung aliba den pa wadang takok ngua aoba ajanga, pa tetushi tulu agüja liasü.

Nüngtugu ken 'Someone You Loved' atensang, Lewis-i Song of the Year aser Top Streaming Song category nung award angu. Kasa mapay, 'Before You Go' atema Hot 100 Song jenjang ajangzükter aser track

anaprongla atema pai Songwriter of the Year award agizük.

Video ka ajanga, taküm indang ASCAP London Music Awards takok angu ajak nem tenüngsang agütsüba mapang, ASCAP Chairman of the Board aser President, Paul Williams-i, "Asenok tsüngda ongdang komaka tulu aliyongjia, asenok ajak tanela nung sendaktepa lir," ta ashi.

"Nenok music ajanga onok mulung nung jembir aser iba tesendaktep yimdangi arur. Nenok ken ajanga nübur million aika den tesendaktep yangludang, asenok tsüngda tesendaktep tali dang akangshidaktsür," ta pai ashi.

"Iba tesendaktep tajung ajanga alima nung temelenshi tajung adokdaktsütsü akok. Taküm iba award sentong nung takok angur ajak nem

tenüngsang agütsür," ta pai shisem.

2020 indang top songs' rongnung Black Eyed Peas aser J Balvin na indang 'RITMO' - (co-written by Pete Glenister) den liasü, kong -Corona indang 1995 hit 'Rhythm of the Night' indang sample ken ka dena lir aser iba track ajanga Top Hot Dance/Electronic Song aser Hot 100 Song prize anaprongla angu.

Joel Corry ft. MNEK indang track 'Head & Heart' den ken zülur MNEK, Neave Applebaum, Robert Harvey, Lewis Thompson aser Leo Kalyan nungeri Hot Dance/Electronic Song Awards agizük.

'Happier' (by Marshmello ft. Basville) atema Steve Mac aser Bastille's Dan Smith nati Hot Dance/Electronic Song Awards angu.

Kasa sentong nung, ASCAP-isa film aser television atema composer tajung nem award agütsüogo. 'Birds of Prey' atema Daniel Pemberton-i award angu. Birds of Prey ajanga Box Office nung takok tulu ngua liasü. Kasa mapang, Christopher Benstead ('The Gentlemen'), Isobel Waller-Bridge and David Schweitzer ('Emma'), Andrew Lloyd-Webber ('Cats'), Natalie Holt ('Infidel') aser Devonte Hynes ('Queen & Slim') nungeri award angu.

Television tsütsü, Maurizo Malagnini aser Peter Salem ('Call The Midwife') nem Top Cable Series aser composers Dan McGrath o Josh Philips ('Dancing With The Stars') nati Top Network Series ngua liasü.

Maneni, Top Streaming Series & Film award ya Martin Phipps ('The Crown'), Isabella The Machine Summers ('Little Fires Everywhere'), aser Rob Lord ('Troop Zero') nungeri nguogo.

## October 29 nü 'Hum Do Humare Do' sayatsü

**New Delhi, Mongputeni/October 19, 2021 (Agencies):** Bollywood actor Rajkummar Rao aser Kriti Sanon indang 'Hum Do Humare Do' film ya October 29, 2021 nü digital sabang nung sayatsü terenemba lir.

Rajkummar-i Instagram sabang ajanga iba osang lemsatepa liasü

'#disneypluhotstar ajanga October 29, 2021 nü 'Hum Do Humare Do' sayatsü," ta pai lemsatep.

'Hum Do Humare Do' nung Rajkummar aser Kriti nati tanaben külemi shilem agiba angutsü. Iba film meyagludang, Kriti aser Rajkummar nati 'Bareilly Ki Barfi' nung külemi shilem agiba nguogo.

Bodhbarnü, film yanglurtemi 'Hum Do Humare Do' indang

teaser ka lemsatep, kong iba teaser ajanga production house Maddock Films' indang taoba movie tem talisa 'Stree', 'Luka Chuppi', 'Bala' aser 'Mimi' tem indang shilem tilala sayua liasü. Iba sülen, kasa teaser nung Kriti aser Rajkummar na indang character metetpeladaksü aser "Ab humara hero kya karega?" ta tasüngdangba ka agütsü. Iba teaser nung Rajkummar Rao indang character ya kanga dang nüma-metangtetti/aakseta Kriti Sanon indang character ataba sayur aser second ishika tsüngda frame telungi Kriti aiba sayuogo.

Kasa teaser nung Paresah Rawal den Ratna Pathak Shah naprongla sayua liasü.

Dinesh Vijan ajanga sayatsü aliba 'Hum Do Hamare Do' film ya Abhishek Jain-i direct süogo. Maddock Original film ya

October 29 nungi tenzüka Disney+ Hotstar nung sayatsü.

Maneni, Rajkummar-i horror-comedy 'Roohi' nung Janhvi Kapoor den külemi shilem agiba tesüsa nguogo. Raj-isa 'Badhaai Do' nung tongti shilem agütsü terenemba lir. Ano külen, Kriti-i dramedy 'Mimi' nung tesüsa shilem agia liasü, kong lai 'surrogate mother' ka ama shilem agiba nguogo.

## Rajasthan sorkari Health Workers tem...

(Tapak 7 nungi...)

Osang ajanga ashiba agi, pai ketdangsurtem dang malaria, dengue mesera chikungunya agi shiranger kar danga potetra, shiranger ki temeket nung aliba ki 50 nung anti-larva exercise benoka inyaksü tuyuogo. Maneni wara balala poktetba nokdangtsü atema nüburtem

## Pelaba Lemsateper



ASO : 18<sup>th</sup> June 1981

ASÜ : 4<sup>th</sup> Oct. 2021

Onoki teti meima aliba Asür **Wabong Watsanen Longkümer** (Changtongya), Dikhu ayong nung taküm samar, tsürapur aser kinungertem mangyima shisabulu khuret agi neniter koda masüba tejashi ka nung alidang, kija, kibongtem, arogo, yimten, kishikinar arogo aser yimten, bendang balala aser lokti balalai ozü Changtongya Kosasanger Putu yimsüsür küpok yimteni ajaayanga anogo asem pezü tashi timtim jenti agia nübo, rongsen, shisatsü aser pei akaba tajungtiba agi onok yariogo aser mang ngua tiptema mapatem tembangtsüogo, ya asoshi nübur ajak dang pelaba lemsateper.

Onok tashi agi meyipa agütsütsü kecha maka, saka tajungsang asen tebu Tsüngremi nenok mapa tajung asoshi molamoshia moajang ta onok tamang aser sarasadem.

Tsüngrem tenüng sanga item lokti aser kibongtem metetshi-i melitet nung maneni pelaba lemsateper:

1. Changtongya yimten yimsüsür, arogo aser nüburtem
2. Shiyong nüburtem
3. Changtongya Yimsen arogo, yimten aser nüburtem
4. Changtongya SDO (Civil) aser pa den ketdangsurtem
5. Changtongya O.C-i anir par department
6. Changtongya Town Ward 11 nung ward chairmn-i anir nüburtem
7. Akhoya arogo, yimten aser nüburtem
8. Yaongyimchen arogo, yimten aser nüburtem
9. Alayong arogo, yimten aser nüburtem
10. Sanglu arogo, yimten aser nüburtem
11. Yachem arogo, yimten aser nüburtem
12. Nokjosang arogo, yimten aser nüburtem
13. Yongshai arogo aser yimten
14. Orangkong arogo aser yimten
15. Chuchuyimlang yimten aser nüburtem
16. Yaongyimsen arogo, yimten aser nüburtem
17. Nükshiyim yimten aser nüburtem
18. Liroyim yimten aser nuburtem
19. Ghari tenlartem ajak
20. Lt. Watsanen'er Zünger
21. Shri. Imokaba Jamir (IRS)
22. Shri. Taka Masa Ex. MLA
23. Shri. Imnatiba MLA
24. Sarasadema khuret bentsür ajak.

**Temeim Tsürabur, Jalatem, Kinunger aser Anükapang.**

## PELABA LEMSATEPER



ASOBA:  
1928

ASÜBA:  
06.10.2021

Temeim ojala asür **Longrilila** (Aliba) akümlü wadang temer alima nungi pilaba anogo nung onok mangyim jashi nung alidang kinungertem, yimtsür yimertem, lokdi balala, jaka balala nungi shirnokisa mapang, rongsen, sarasadem ajanga yaritepogo ozü kinunger ajaki kanga pelaba lemsateper. Nenok mapa tajung asoshi onoki agütsütsü kecha maka saka asen takar Tsüngremi meyipa moajangma, aji ozü sarasadem.

**Chirurtem aser semchirtem**

nem tangazükba agütsütsü shirangertem jangjaa parnok asoshi ketdangsurtem dang temang anepalutsütsü shiogo. tetuyuba agütsüogo.

Maneni pai, yimra wara October 18 nü tashi nung balala atema mozü tapet Rajasthan nung dengue aser supply kecha tetsükdaksü yimra wara balala agi nisung makai agütsütsü aser 6,797 dak kongshiba tashidak pokteta aliba sangdongogo. Shirangertem tesemtem nung kishiai tua ya Jaipur nungi 1,411 lir ta ken o asadangtsü aser ketdangsur kati ashi.

## NSF Trophy: Puliebadze, Berenike aser Viswemi FC nungeri kokogo



Kohima, Mongputeni/October 19, 2021: NSF Martyrs Memorial Trophy asayamung nung Puliebadze FC aser Dynamic FC team tsungda asayaba mapang tangokba noksa ka yangi angur.

**Kohima, Mongputeni/October 19, 2021 (TYO):** Mongolbarnü, Indira Gandhi Stadium kübok 21buba NSF Martyrs' Memorial football asayamung nung, taoba mapang takok angur Puliebadze Club Jotsoma, Berenike Football Club Meriema aser Viswemi FC team temi pei pei tata asaya takok anguba sülen, iba asayamung pre-quarter final tongogo.

Mezüng match nung, taoba NSF Martyrs' Memorial asayamung takok angur Puliebadze Club-i Dynamic FC madak 3-1 agi takok angur. Iba asaya nung Puliebadze atema Oinam Mete-i goal ana idaktsü aser Nipusizo-i goal tasembuba inoktsü. Kasa asaya nung, Dynamic FC atema Lani-i goal ka idakja liasü.

Iba asaya metenzükdang, Puliebadze Club-i Naga nunger football asayar tejen, asür Aotemjen Kibang Jamir, shiba

tawa iba akümüli nungi pila ao, pa nem akhüm agüja liasü. Kibang-i football wadang nung ajemoka East Bengal, Mohammedan Sporting Club, Tollygunge Agragami aser Sporting D Goa atema asayaogo.

Iba asayamung organising committee den club anapronglai minute ana tashi süngjema mokremer asür Kibang nem akhüm agütsü.

Tanabuba match nung, Berenike FC Meriema-i tie-breaker ajanga Chüziema FC madak goal 7-6 agi takok nguogo. Latetja aliba mapang tashi asaya aser team anaprongla goal 2-2 nung tembangba sülen, tie breaker asaya liasü.

Iba asaya nung, Berenike FC atema Petevizo Kezieo-i mezüng goal inoktsü aser Chüziema-ia telangzüba agüja Medozieu goal ka idaktsü. Iba sülen team anaprongla nungi

Shürhosül Zhotso aser Menguzelie nati goal ka ka idakja, iba asaya draw (2-2) nung tembang. Ajisüaka, tie breaker nung Berenike FC-i goal 7-6 agi Chüziema tsükdaktsü.

Maneni, kasa asayamung tasembuba match nung, Viswemi FC aser Invictus FC Khezhakeno na asaya liasü, kong Viswemi-i goal 3-2 agi Invictus tsükdaktsü. Iba asaya nung, Viswemi FC atema Metol Neikha, Kelengoto James aser Vipukho nungeri goal ka ka inoktsü. Invictus FC atema, Neiniow aser Kekhrrie nati goal ka ka idakja liasü.

\* **Bodhbarnü (20.10.2021)**  
**asaya yamai alitsü:**

1. Billy Graham FC vs Bandits FC Kohima @ 11:30 AM
2. Adüfü Christian Institute Manipur vs Young United 18 Boys @ 1:00 PM
3. Head Hunters vs United Falcon Medziphema @ 2:30 PM

## Kohima nung Security Force semi volleyball asaya ayongzük



**Dimapur, Mongputeni/October 19, 2021 (TYO):** HQ IGAR (North) kübok Assam Rifles, Kohima Battalion ajanga "Stay Fit Stay Healthy" omen nung ajemdaker October 18, 2021 nü Old Minister Hill, Kohima nung volleyball asaya ka ayongzüka liasü.

Temang anema alitsü aser anema alitsü atema yimya tajung amshitsü nükjidong nung aser ano nüburtem den tesendaktep tali tashi itshitsü mechi iba sentong ya ayongzüka liasü.

Iba asaya ya Old Minister Hills nung aliba nüburtem aser Assam Rifles sepaitem tsüingta

asaya liasü.

Temang anema alitsü tangatetba nung telok anatsülen nungi tejangraba tulu nung asaya liasü.

Iba ama sentong ayongzükba atema nüburtemi Assam Rifles tem dang pelaba lemsatempa liasü.

## Denmark Open: Sindhu aser Srikanth nati takok angur

**Odense, Mongputeni/October 19, 2021 (TYO):** Mongolbarnü, Denmark Open badminton asayamung tetsü kija mezüng round asaya nung, India tsür PV Sindhu-i takok ngua la tanabuba round-i iogo.

BWF World Tour Super 1000 tournament tetsür kija asaya mezüng round nung, World champion, Sindhu-i Yigit madak 21-12, 21-10 agi takok angur.

Seed pezübuba, Sindhu, shibai Tokyo Olympics nung asayar sülen Sudirman Cup aser Uber Cup Final nung masaya, iba asayamung tanabuba round nung lai Thailand tsür Busanan Ongbamrunphan den asayatsü. Kasa asayamung tebur kija

mezüng round asaya nung, taoba mapang champion, Srikanth aser Sameer nati pei pei tata asaya kokogo.

Iba tetoktepa nung, Srikanth-i B Sai Praneeth madak 21-14 21-11 agi takok angur. 2017 küm iba asayamung takok angur, Srikanth-i minute 30 nung iba asaya akok. Ano, külem India nunger Sameer-i Thailand nunger Kunlavut Vitidsarn madak 21-17 21-14 agi takok nguogo.

Tebur kija tanabuba round nung, World no. 14 Srikanth-i world no 1 aser top-seed Japan nunger Kento Momota den asayatsü. Kasa round nung, Thailand tsür Busanan Sameer-i Denmark nunger Anders Antonsen den asayatsü akok.

## 'Honorary Life Members' nung Harbhajan aser Srinath denogo



**New Delhi, Mongputeni/October 19, 2021 (Agencies):** Marylebone Cricket Club (MCC) indang Honorary Life Members tasen 18 rongnung England cricket asayar Sir Alastair Cook, Marcus Trescothick, Ian Bell aser Sarah Taylor nunger den Harbhajan Singh aser Javagal Srinath denogo, ta sangdong ajanga metetdaktsü.

"MCC-i alima nung cricket asayar tajungtiba shima Club indang Honorary Life Membership agütsür. Iba Club nung asayar tasentem (tetsü aser tebur) tenüng züngoka aser iba osang sangdongtsü maongka anguba atema pelar," ta Twitter ajanga MCC-i lemsatp.

Taoba India cricket team nung fast bowler ka ama asaya nungi anenba sülen, Srinath ya ICC match referee ka aküm. Ano külem India nunger spinner takotet Harbhajan-i ODI asaya nungi anenba sülen nung pai Kolkata Knight Riders atema asayar.

"India nunger Harbhajan Singh aser Javagal Srinath napronglai international career nung takok ngua shilem agiogo.

Test asayamung nung wicket timtiba agir India nunger rongnung Harbhajan tasembuba asütsü; pai Test 103 nung wicket 417 agia lir. Ano külen, India cricket team nung ODI asayar tajung rongnung Srinath ka asütsü. ODI asayamung balala nung Srinath-i wicket 315 agia lir, koba ODIs nung wicket timba agir India bowler rongnung pa tanabuba asütsü," ta MCC-i ashi.

Harbhajan aser Srinath dak alaka, MCC indang Honorary Life Members nung South Africa nungi Hashim Amla, Herschelle Gibbs, Morne Morkel aser Jacques Kallis nunger dena lir. Australia nunger Damien Martyn aser Alex Blackwell naprongla iba Club nung züngsem ka ka kümogo. West Indies nungi Ian Bishop, Shivnarine Chanderpaul ase Ramnaresh Sarwan nunger nem Honorary Life Membership agütsüogo.

Maneni, iba Membership nung Sri Lanka nungi Rangana Herath, Zimbabwe nungi Grant Flower aser New Zealand nungi Sara McGlashan nunger dena lir.

**BILEMDANGANG**

**"Ani belem ajak arema inyaker külenang takokji angur"**